

Pergunta ba Partidu Polítiku

La'ó Hamutuk nia pergunta ba Partidu Polítiku sira ne'ebé sei kompete iha Eleisaun Parlamentar periodu 2017-2022

Pergunta jerál ba Partidu Polítiku sira

1. Saida mak sai *vizaun estratéjiku* atu lori povu no nasaun Timor-Leste durante tinan lima oin mai karik povu hili ita boot sira nia partidu manan maioria iha elisaun jeral ne'e?
2. *Programa prioridade* saida mak partidu ne'e lori hodi konvense votantes sira? no hatudu katak ita-boot sira nia programa mak di'ak liu ba Timor-Leste?

Pergunta ba asuntu ekonomia

1. *Dezde 2012, Timor-Leste nia reseita husi mina no gás tun maka'as no lalais, no iha tinan oin (2018) sei tun ba maizumenus tokon \$80, no para iha 2021.* Maske Timor-Leste nia posu mina bayu undan atu hotu no posu greater sunrise kontinua iha inserteza, setór produtívu sira hanesan agrikultura, fábrica no turizmu seidak iha kreximentu. Polítika saida mak ita-boot nia partidu sei trasa atu hasa'e ekonomia Timór-Leste no sustenta finansas estadu bainhira mina-rai sei maran?
2. Besik kada tinan, *Governu viola Fundu Petrolíferu (FP) nia matadalan Rendimentu Sustentável Estimadu (RSE)*, no Orsamentu Estadu 2017 iha planu atu gasta besik dala haat (4) RSE kada tinan entre 2018 to'o 2021 Durante tinan haat ne'e, 74% estadu nia despeza sei mai husi FP. Polítika ida ne'e sai hanesan ameasa boot ba estadu nia sustentabilidade, no FP bele mamuk iha tinan sanulu oin mai. Karik eleitu, oinsá mak ita-boot sira sei garante FP nia sustentabilidade iha futuro?
3. Dezde tinan balun ona, *Governu hahú implementa projetu indústria petróleo Tasi Mane iha Kosta Súl, no gasta ona besik tokon \$230.* Projetu ida ne'e sei presiza biliaun ba biliaun tan husi povu nia osan. Maibé, ajénsia internasionál, peritu independente sira, akadémiku no peskizadór sira husi nasaun laran la fiar katak projetu boot sira sei hetan retornu finansial no sosiál boot liu ninia investimentu no impaktu. Ita boot nia partidu hanoin projetu ida ne'e bele fó benefísiu ba povu Timor-Leste nia futuro? Se lae, saida mak ita boot sira sei halo atu kansela projetu ida ne'e, no oinsá ita bele uza rekursu ne'ebé hetan libertasaun bainhira Tasi Mane kansela ona?
4. Daudauk ne'e, Timor-Leste nia povu, feto no labarik sira seidak hetan edukasaun no saúde ho kualidade, maibé alokasaun iha orsamentu estadu kontinua menus duké aeroportu, portu, projetu Tasi Mane, ZEESM no estrada boot sira. Saida mak ita boot nia partidu sei halo atu resolve problema ida ne'e?
5. Timor-Leste nia populasaun maioria ho idade nurak no foin-sa'e. Foin-sa'e barak too oras ne'e laiha servisu no universidade sira kontinua prodús graduadu barak, maibé kampu de traballu limitadu liu atu simu sira. Oinsá partidu polítiku sira nia programa atu kria kampu traballu ba foin-sa'e sira no ba sira ne'ebé gradua husi universidade tinan-tinan?

Pergunta ba Partidu Polítiku

6. ***Timor-Leste asina ona kontratu empréstimu ho valór total tokon \$400, no iha planu atu foti empréstimu ho valór \$1.2 biliaun entre 2017-2021.*** Maioria osan deve ne'e sei selu ba projetu boot ho retornu ne'ebé la klaru hanesan Tasi Mane, aeroportu Dili, estrada no auto estrada no La'ó Hamutuk haree katak deve sei sai problema boot ba Timor-Leste bainhira mina maran ona no Timor-Leste tenke selu ba ninia kreditór sira. Ita boot nia partidu konkorda ho polítika empréstimu ida ne'e? Se lae, oinsá mak ita boot sei evita Timor-Leste nia deve kontinua sa'e to'o nivel ne'ebé la sustentável?
7. Timor-Leste atualmente konsentra maka'as liu ba projetu boot sira, ne'ebé tuir peskizadór, akadémiku, Polítiku no povu bain-bain sira konsidera sei laiha benefísiu ba povu nia moris no la ajuda sustentabilidade ekonomia nasaun nia, Polítika saida mak ita-boot sira nia partidu sei halo atu ajuda ajénsia estadu no privadu sira bele promove transparénsia, check and balance, kontabilidade no prevene husi korrupsaun?
8. ***Daudauk ne'e Timór-Leste iha esforsu boot atu sai membru ASEAN,*** maibé infelizmente iha estadu ASEAN barak sei iha violasaun direitus umanus grave no korrupsaun boot. Karik Timor-Leste sai nudár parte ASEAN iha futuro, polítika saida mak ita-boot nia partidu sei trasa atu ajuda hodi hamenus violasaun direitus umanus iha ASEAN laran?
9. Bainhira Timor-Leste sai membru ASEAN, ita tenke adopta prinsípiu merkadu livre, ida ne'e sei hamenus Timor-Leste nia kapasidade atu dezenvolve nia ekonomia produtivu iha rai laran hanesan agrikultura, turizmu, manufakturasan no seluk-seluk tan, oinsá ita-boot sira nia partidu nia pozisaun kona-ba ASEAN no saida mak ita boot sira sei halo atu minimiza impaktu merkadu livre se TL sai duni membru ASEAN?
10. ***Prezidente Lu-Olo foin promulga Lei tolu kona-ba asesu ba rai,*** maibé lei sira ne'e iha aspetu balun ne'ebé la fó benefísiu ba povu ki'ik sira. Karik eleitu, polítika saida mak ita-boot sira sei halo atu ajuda povu ki'ik sira hodi haforsa direitu ba asesu ba rai no atu proteje povu kontra espropriasaun no eviksaun ilegál ka labele justifika?
11. ***Durante década ikus ne'e, governu aloka maizumenus tokon \$30 kada tinan atu dezenvolve setór agrikultura,*** no aloka osan barak liu ba mega-projetu sira, pensaun ba veteranu sira, no administrasaun públiku. Saida mak ita-boot sira hanoin kona-ba polítika ne'e? Timor-Leste bele kontinua nafatin hanesan ne'e ba futuro?
12. Tinan-tinan, ***Timor-Leste importa ai-han husi rai-li'ur, no deficit komérsiu ba bens no servisu liu biliaun ida kada tinan.*** Maske nune'e, Governu deside ona atu harii portu Tibar atu fasilita importaun. Maibé, produktu baratu importa husi li'ur halo difisil liu tan ba agrikultór sira iha rai laran hodi kompete, no ida ne'e hamenus ita nia produsaun. Polítika saida mak ita-boot sira nia partidu sei halo atu hamenus importaun no maximiza produsaun lokál bas konsumsaun lokál?

Pergunta ba Partidu Polítiku

Pergunta ba asuntu polítika, demokrasia no seguransa

1. *Relatóriu CAVR “Chega!”*, KPP-HAM Indonézia, Komisaun Peritus ONU nia rekomenda atu kria Tribunál Internasionál hodi julga autór krime kontra *umanidade iha Timór-Leste husi tinan 1975-1999*. Maibé, autór krime grave sira ne’e nafatin livre iha Indonézia no kaer podér boot, no sira seidak ba hatán iha tribunál. Polítika saida mak ita nia partidu sei halo atu hakotu impunidade ba krime pasadu?
2. *Okupasaun Indonézia iha Timór-Leste halakon ema barak ho obrigatóriamente*. Ita-boot sira hanoin katak Timór-Leste bele ratifika Konvensaun Internasionál ba Ema Lakon (International Convention for the Protection of All Persons from Enforced Disappearance) ka lae?
3. *Iha tinan 2013-2015, iha operasaun militar boot iha Timor-Leste ba buka, kaer no oho Mauk Moruk ho nia elementu sira*. Operasaun ida ne’e halakon tiha sidadaun sira-nia direitu no liberdade fundamentál no respeito ba estadu nia prinsípiu kona-ba direitu demokrátiku; saida mak ita-boot partidu sei halo atu Timor-Leste la bele repete tan polítika ida ne’e?

Naran Responde:

Naran Partidu :

Data :

Asinatura :